

Թիֆլիզից ուղեկցում էին Թեմիս ս. Առաջնորդն ու անդամ վարդապետը, կարգադրիչ Յանձնաժողովի անդամների մի մասը և այլ պատգամաւորներ:

Սանահնում ընդունելութիւնը խիստ վայելուչ էր. Ն. Ս. դիտեց վանքն ու միւս հնութիւնները, որոնց մասին մանրամասն բացատրութիւններ էր տալիս պ. Ստ. Լիսիցեանը: Վեհր գիշերեց այնտեղ և միւս օրը ուղևորուեց դէպի Ալէքսանդրապոլ, և այնտեղից Անի: Վերադառնալով Ալէքսանդրապոլ վեհափառը շարունակեց իր ճանապարհը, ամբողջ ճանապարհին ընդունելով բոլոր հայաբնակ վայրերի հասարակութիւններին աղոհացով և ճառերով ու կեցցէներով և հուսկ ուրեմն յուլիսի 26-ին Տիրոջ յաղողութեամբ մուտ գործեց իւր Աթոռանիստը՝ ս. Էջմիածին:

Վեհափառը առօրէ է և ժիր և մեզ վերայ թողեց իմաստալից անձի տպաւորութիւն:

Լ Ո Ւ Ր Ե Ր

Ազգիս Վեհ. Հայրապետի օծումը, ինչպէս հաղորդել է Սինօդը տեղոյս մի քանի լրագիրներին, նշանակուած է առաջիկայ սեպտեմբերի 13-ին:

Կովկասեան Հայոց Բարեգործական Ընկերութիւնը Թիֆլիսի իւր բնակարանում, Աբաս-Աբաղեան փողոց, բաց արաւ գրադարան-ընթերցարան:

Վեհ. Հայրապետը Անի եղած միջոցին պրօֆ. Մառին յանձնել է 600 ռուբլի Անիում կատարուող պեղումների համար:

Մոսկուայի հայ հասարակութիւնը 12000 ռուբլի է ժողովել Էջմիածնում Ազգիս Վեհ. Հայրապետի համար մի վայելուչ վեհարան շինելու համար:

Կառավարութեան հրամանով դադարեցրած է «Գործ» օրաթերթը վնասակար ուղղութեան համար:

Օգոստոսի 1-ից լոյս է տեսնում «Հօրիգօն» անունով մի ուրիշ օրաթերթ:

Լոյս տեսաւ նաև «Սուրհանդակ» անունով լրագիր, առ ժամանակ երկուշաբթի օրերը:

Վանաց եկեղեցու թանգարանի վարչութիւնը ձեռնարկել է «Կիրակոս Գանձակեցի» պատմագրի հրատարակութեան:

Աղգիս Վեհ. Հայրապետի Սանահին այցելելը մի բարի գործով նշանաւորելու համար կազմուած է մի մասնաժողով՝ բաղկացած պ. պ. Ստ. Լիսիցեանից, Եր. Լալայեանից, Ի. Յարութիւնեանից, և Գիւտ աք. Աղանեանից՝ Հաղբատի հինաւուրց նշանաւոր վանքի վերաշինութեան համար: Մասնաժողովի պատուաւոր անդամ է հրաւիրուած պ. Մ. Արամեանցը, որ խոստացել է և իւր նիւթական աջակցութիւնը: Մասնաժողովը ներկայանալով Նորին Սրբութեան ամենայն Հայոց Կաթողիկոսին Սանահնում՝ ստացաւ Նորա օրհնութիւնն ու հաստատութիւնը և թիմիս սրբ. Առաջնորդի հաւանութիւնը: Մասնաժողովն արդէն սկսել է կարևոր խորհրդածութիւններ կատարել:

«Баку»-ի մէջ կարգոււմ ենք, որ ներկայումս Ռոստովի և Նովոչերկասկի բանտերում գտնոււմ են մօտ 500 հոգի, որոնք ձերբակալուած են «Դաշնակցական» գործի պատճառով, և բանտերը իւրաքանչիւր շաբաթ լցւում են Կովկասից յատուկ գնացքով բերուող ձերբակալուածներով:—Նոցանից մի քանիսը, ինչպէս երևում է, արձակուելու են զրաւականներով: Մինաս Բերբերեանին արձակեցին 15,000 ռ. զրաւականով, իսկ զբաղէտ Ա. Ահարոնեանը դեռ բանտումն է և ցաւալին այն է, որ նա բանտում հիւանդ է: Բանտարկեալի որդին գնաց Ռուսաստան, որ միջնորդէ գոնէ թոյլ տալ մասնաւոր հիւանդանոց տեղափոխել նորան:

Թաւրիդից «Русск. Слово» լրագրին հաղորդում են, որ առաջիկայ տարուանից այնտեղ բացւում է հայկական համալսարան: Հայերի այն ցնորքը, որ ունենան իրանց բարձրագոյն դպրոցը, իրանց հայ գիտնական և կուլտուրական կենտրոնը-իրագործոււմ է: Այդ բանը նոցա թոյլ չտրուեց Ռուսիայում և նոքա շինում են Պարսկաստանում: Ապագայ համալսարանի համար արդէն յատկացրած է յարմարաւոր տուն, մեծ պարտէզով և միջոցներ են ժողովել. համալսարանական հիմնական դրամագլուխ է դրուած 75,000 ռուբլի, որ լուսաւորութեան նպատակի համար կտակել է Թիֆլիս վախճանուած հայ բարեգործ Զուրաբեանը: Բժշկական ֆակուլտէտի պիտոյքների համար դիտաւորութիւն կայ ընդարձակել Թաւրիդի քաղաքային հայ հիւանդանոցը և կլինիկայի վերածել: